



STAFF QUARTERS CHUNG EXTENSION NASEP CHU A CHIATHA ZING HI



To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



ESTD. MARCH 2008

JULY 2024

Hinna Vâk

AN ORGAN OF THE TANGPHAI PRESBYTERIAN CHURCH



TANGPHAI SYNOD IN PATHIAN THU ZILNA I THÎL
DING DAN UH

- India Gam Politics leh Gamthak nasep zel ding dan
- Jesu Nungzui dikte leh sumdawngna dik
- Khanglaite leh mani kitodel
- Chingmei Presbyterian Kochuam Chanchin

EDITORIAL | SERMON | KOCHUAM HUANG | REPORTS | SÛNNA ETC.

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
 : Rev. K. Jama Vaiphei
 : Rev. Th. Samuel Vaiphei
 : Upa Lalmingsang
 : Upa S. Lalpi
 : Pi Hawipakkim, Secretary, CKNP
 : Tv. Lianmuanthang, Secretary, CKKP

Business Manager : Pu Langlalthamuan
 TPC Office D. Phailian
 P.O. Box 107 CCPur-795128 Manipur
 Phone No. +91 9958160325
 Email - ehinnavak@gmail.com

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

- | | |
|---|----|
| 1. EDITORIAL | 01 |
| 2. KOCHUAM HUANG | 02 |
| 3. TANGPHAI SYNOD IN PATHIAN THU ZILNA I THÎL DING DAN UH | 04 |
| 4. INDIA GAM POLITICS LEH GAMTHAK NASEP ZEL DING DAN | 10 |
| 5. JESU NUNGZUI DIKTE LEH SUMDAWNG NA DIK | 18 |
| 6. KHANGLAITE LEH MANI KITODEL | 24 |
| 7. CHINGMEI PRESBYTERIAN KOCHUAM CHANCHIN | 28 |
| 8. SERMON | |
| a) Sunggil lam ah takna | 37 |
| b) Hun kipâkum in ka ngaithai | 39 |
| c) Hepina mak | 41 |
| 9. KNP HUANG | 43 |
| 10. KKP HUANG | 45 |
| 11. SUNNA | 47 |

SYNOD PUIPATE

Moderator	:	Rev. Kamkhotinthang Neihsial
Secretaries	:	Rev. Thanglianlal (Sr.) Rev. Andrew LR Khiangte (Jr.)
Finance Officer	:	Rev. S. Khaikhawlam
Statistician	:	Upa S. Thongzalal
Executive Secretary	:	Rev. S. Lama Vaiphei
Consultant	:	Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Pathian mapuina zal in kum 2024 kum kimkhat tiang lăngkai in i um kit ta, Pathian kiang in kipakthu gen hitiu.
2. Gam pâm ah Kochuam - Pillangkata (Guwahati), Delhi leh Bengaluru ten masawnna kipakum tak a nei thei zel zia kun kipakthu gen hitiu.
3. Bial enkawltu Pastor, Pro. Pastor, Evangelist, Kochuam Upa leh Tual Upa te â ding in pauchap hitiu.
4. Gamsung buaina zia ah panlatu pawl chuam chuam ah puitute â ding in pauchap hitiu.

PATHIAN THU ZIL

Nidang lai a chun Baibul zil ti hi i paumat dan tangpi uh a hi sek ah, tulai a hi Pathian thu zil ti hi i matdan tangpi uh a hung hi tai. Pathian thu zilna lam a hinle i Kochuam hin nasa tak in ma i sawn thei tau ah kipak um takzet a hi.

Nidang a chun Pathian thu zilna mumal neilote haw Pastor nasem ding in i la mang mai sek ua, tu dinmun a hin chu BA.BD hi a niam pen ah i nei dan uh a hung hi tai. Tu leh tu ah i Pastor teu hi Mth.-5 leh Mth. Zillai-1, chuleh Dth. Zillai-1 i nei thei tau hi.

I khanglaiteu lak ah Pawsal BD zil zosa -8, Mth zosa -2, Mth. Zillai -2, i nei ui. Numei BD -1, Mth.-1, Dth zillai-1 i nei bawk ua, chuleh numei leh pawsal BD zillai le hunkhawp tak i nei nalai ui.

Pathian thu zilna huang a chun bang bang hi a zil sek uh a hi diam ti hi mi tamtak ngaiven a hi ding ginchak a um hi. Senior Pastor pakhat in a genna a chun *“Pathian thu zilna huang a chun bangkim ka zil ua, Bible tilo chu ka zil kim vek ui”* a la ti hial a hi. Ei un a Bible sung thu hi gun tak ah va zil ding ah i ngai lai in Bible pawlam a va zil nasa ma mau ti a kilang thei hi. A Bible pen hi chu subject khat vel bep in a chiapi ua, a sim ding dan, a zil ding dan leh a hilchet ding dan te zil in, inlam ah mani kizil nasat a ngai hi. Doctor thiam te le a ki update zello ualeh mattaklo a hui a ti gual tho ua khan, Pathian thu thiam tele a kizil peilo chu title bep a hin chu mualpho ziang thei dinmun a hui.

Pathian thu thiam i pungto zel ah, Thagau ah dim i tawm hiai hiai un a lang ah, zil mite’n le Thagau Thiangtho pawlna ngaisak hi tiu in, Kochuam mipi zosian pan nasa tak ah i lak ua, i mithiam teu hawn le Thagau Thiangtho pawlna a chan thei na ding un pauchappi zel hi tiu.



Kochuam Huang

Relief kipia

1) 20-04-2024 niah Thigawpi'n

In a suksiat ziaak ah haksatna
thuakte panpina O.M. in
ziagual hin a hawmdawak hi-

L. Munlui Kochuam

₹ 84,000

Lingsiphai (In 3) leh

Mata Vengthak (In 2)

₹ 38,000

2) Gambuai ziaak a haksatna

tuak New Moreh Kochuam,
Myanmar sung ah Bial 2 te
leh, S. Kawtlian, Kangvai
Bial sung ah umte kiang in
Inkuan tin ah Anchang half
bag piak a hui. [OM 28:2(5)]

New Moreh Kochuam -

₹ 68,000/-

Nanphalong 44 x 2000 -

₹ 88,000/-

Tungkyaw 60 x 2000 -

₹ 1,20,000/-

3) S. Kawtlian Bial leh Kangvai
Bial (SEC 9:5 ; OM 26:6) :

S. Kawtlian - Anchang Bag 98

Kangvai -Anchang Bag 190

Generator thak

I Synod Office mat ding
Generator thak ₹ 4,65,000/-
man chawak ahia, a lui pen chu
RMHS te mat ding ah piakdaw
a hi

E/S Room (Office) ah Toilet siam a hi

Synod Office ah Executive
Secretary room ah Toilet attach
ding ah O.M. 28:9 in thupukna
a siam chu Office lam in bawzui
in, May 27-28, 2024 sung ah
khan toilet um theina ding ah
Executive Secretary room ding
chu siamlem nâ a lah sem ua,
May 29 ah khan zo thiang in,
Executive Secretary in a lua
pan tai.

Panglian Pastor Bial etkawl ding dan

Panglian Pastor Bial enkawltu
Rev.Thangneipau chudamlona
ziaak in Bial sung in a um thei
pua, Chanchinthak dang a um
masia a pawimaw dungzui ah

HINNA VÂK

Office lam in a etkawlah, Pro. Pastor Lamgoulia Hatlei in a pawimaw dungzui ah Bial sung ah Kochuamte a tawthak sek ding leh, a pawimaw dan ah hun a va matpi thei sek ding in O.M. chun a guanggalna a siam hi.

PCI Dan Bu

Tangphai Synod leh Khuga Sadar Presbytery (KSP) kithuakhawm a PCI Dan Bu thak (Vaiphei Edition 2022) ledawna nasep chu zawthian a hita. Minister leh Pro. Pastorte ban ah Kochuam tin copy khat a thawn ah piak ding in Synod Literature & Publication Board 6:5 of 15-04-2024 chun pha a sa, mimal a dawite'n Office mun ah cheng 60/- ah chawk thei zing a hi.

Relief House ah Bench kawiding thu

Relief House ah IDP te â ding Bench (YVA Bench gual) kawiding OM in pha a sak chu, Relief & Development Committee leh Kochuam Committee khut ah a siamna di van kipia in, a la siampiak ziang dingua ngansia ahui. (OM 26:8 of April 9, 2024)

- 1) Sumtukphai - 102 benches
- 2) Buallian - 106 benches
- 3) S. Bualkawt - 11 benches
- 4) Sokom - 38 benches
- 5) Panglian - 25 benches

Business Manager kisang thu

Hinna Vak Editorial Board ah Business Manager ah panglai Pu Lalbiaklian chu a lemchang zaw ding ngaitu na'n a ma thasang ding in Pu Langlalthamuan, Office Assistant chu Synod Literature & Publication Board 6:4 of 15-04-2024 chun Business Manager ding in a guat thak hi.

“TANGPHAI SYNOD IN PATHIAN THU ZILNA I THÎL DING DAN UH”

(Hebraite 4:12; II Timothy 3:16)

~ Rev. Siamlalron
Aizawl Theological College

*Amasa'n zia thuzik simtu zosia Lalpa Jesu min in chibai ka hun
bûk hi!*

Hinna Vâk saitute'n zia thupi hi keima zik ding in ei hung
piau ah, kipak um kasak gual ma in ka huphul khawpmai
hi. Ahinla, thupi pawimaw tak a hi zia in ka theitawp sua in ka
hun zik hi. A kim zolo deu leh zik khial khak a um chun simtute
la hiatthiamna'u ka hung dawn hi.

Tangphai Synod in Pathian Thu zilna i thîl ding dan uh ti thupi
ahia, zia chu tawh kizui hiat ding ah pawimaw khenkhatte
zilkhawm hitiu.

1. India gamsung ah Pathian thu zilna chuam chuamte:

India gamsung in Pathian
Thu zilna chuam chuam
- Senate of Serampore
College, South Indian
Theological Seminary
(SITS), Asian Theological
Association (ATA) leh a
dang dangte a um hi. Zia
gual ah Pathian Thu zilna
College/University lak

in Senate of Serampore
College/University nuai
bep inle College chuam
chuam 64 a um hi. Zia zilna
munte ahin zilthei (course)
chuam chuam a college
dungzui in a um ah, zia te
chu - Diploma in Clinical
and Pastoral Counselling
(DCPC), Bachelor of
Theology (B.Th), Bachelor
of Missiology (B.Miss),

HINNA VÂK

Bachelor of Divinity (BD),
Master of Theology (M.Th),
Doctor of Theology (D.Th),
leh Post-Doctoral te zil thei
a hi.

2. Tangphai Synod in Pathian thu zilna i pawm te leh a ziak:

Tangphai Synod in
Pathian Thu zilna mun hi
Serampore University nuai
ah college khat pen pen a
kipawm thei hi. Ahinla, ei
kochuam kikaihuaina tawh
kituak thei deu college
te chu dawichuam leh
ngaikhawk diak a hisek hi.

I kochuam un
Serampore nuai ah college-
te a kipawm na zia chu thil
dang tamtak um maleh a
diak in zilna lam tawh kisai
in Serampore University
nuai ahin taksa leh thagau
lam ah i kochuam dawidan
leh chiapi dan tawh kituak
zilna leh kikaihuaina mun
a hiziak ahi pen hi. Chuleh,
zilna dang cheng sang in
a huap lian in a huapzo
ah, Thagau lam bep hilo

in khawvel chiadan leh
kikaihuainate tawh kizui
ah Pathian gam keklet ding
dan te, a hun leh a mun
tawh ki tuak ah Pathian na
sep ding dan te kizilsakna
mun a hi zia a hi. Zia
haw zosia chun zillaite
leh tunung ah kochuam
hung enkawl tute a ding
in hiatna leh ngaituana a
hilian ma ma hi.

3. Bangziak ah Pathian thu zil pawimaw ahi em?

Pathian Thu zil zosia
hin a hia bukim ui tina lam
hilo in, a zil leh zillo hin chu
kikhiakna tam tak a nei ui.
Khenkhat ngaidan achun
Pathian Thu va zil khel khel
lo inle mihing pilna in a
kihechian thei ma ma hi ti
a um thei sek a. Lam khat
ah ngaitua in ahina tiang
um sek maleh a bukim zo
tak tak sek puai. Pathian
Thu zilte chun thil zosia hi
thîldan chuam chuam ah
thîl in, mi vantâng ngaitua
phaklo tam tak zil ahi zia
un zilna hi a pawimaw

ma ma hi. Chuleh, ginna venbitna lam inle a phachuam in a pawimaw takzet hi.

4. Kuate a h'em Pathian Thu zil ding:

Khamthei bawl a hung phat deu khak leh ti a h'em, lampi dang hiat taklo ziak a h'em, insung ah Pathian Thu zil khat bek um a pawimaw hi ti ziak a h'em ah Pathian Thu hi mawk zil ziang ding a hi pua. Mimal ah Pathian kona diktak hia ah, banglam lam ah le Pathian na sep nawpna neite a ding ah zil bep ding a hi. Chuleh, Pathian Thu zil hi mi tamtak ngaituana a chun Pastor ding a h'em, Missionary ding a h'em te â ding bep ah ngaitua pawl a um ui. Zia chu ahina tiang um sek maleh, Pathian Thu zil hi Pathian Thu hiat belap na dingte, Thagau lam ah khanto zawk diak na dingte, midangte ginna lam dik ah puina ding leh

a pawimawte hilsawn ding ah zil zawk ding a hi.

Kochuam masawn leh khangto zawte chun Pathian Thu zil hi a ngai khawku a, a zil nasa ma mau hi. Mimal ah hiatna belap na ding leh ngaikhawkna ziak ah zil ei kochuam sung leh kochuam dang lak inle a um sau sau ta kipak a um ma ma hi. College va kai khel khel lo inle a gâl ah kipat Pathian Thu hiat belapna ding leh midangte Pathian Thu dik hilsawn theina ding in nasep kawm, inngak kawm leh thildang bawl kawm ah le zil thei zing a hi. Hithei henla Kochuam mi lekha ziltnei zosia hin zil thei nalai leu hin tusang in Pathian thu hiatna lam leh zuina lam ahin mimal leh kochuam ten masawn zaw diak ding i hiu. Ei kochuam inle Pathian Thu zilna lam hi tu sâng in ngaikhawk thak leu hin daw i a um khawpmai hi.

HINNA VÂK

5. Bangziak ah Pathian Thu zil la hem?

Pathian Thu zil hi mi tam tak ngaituana a chun Pathian nasepna ding ti a hisek a, a dik ma a hi. A hinla, kochuam ah chanvo a hung chanlo phat ua leh pawl dang phut dawk ziang, pawl dang ah lut ziang, lung awilo ziang tite ei lak a hin a um sek hi. Kochuam hiatpina leh panpina ah va zil hi ngal, a hung zilzaw phat leh Kochuam vaihawmna nuai ah um peilo, mani lawkna ding leh mimal hamphatna ding bep ngaitua ziang ti le a um thei hi. Ziaziakchun, a zillaite leh a hung zil zel ding te'n le i Pathian Thu zilna ziaak leh i zil guatna ziaak hiatchian ah ngaitua chian a pawimaw khawpmai hi. Pathian ko na leh eima dawina leh lunglutna ngei ah zil zawk ding a hi.

Kochuam dinmun a kibang vek pua, kochuam

dinmun tawh kituak ah sepna ding ngak deu ngai, eima dawitelna lam bep ah lut ziang thei a hilo hun le um thei sek a hi. Pathian in ei kona leh ei sep sak nawpna taphawt chu thanuam tak ah sem ding ah i lungthim siamfel a ngai hi. Zia chu a hilo chun Kochuam ah lungawilo ziang a bailam ma ma hi. Pathian Thu zilzo hita, sepna ding a hung um vak zianglo hun ale, Pathian zai ngak kawm ah, i umna kochuam chiat ua i theina lam chiat ua midangte â ding ah malsawmna hi ding ah theitawp sua ah panlak zel ding a hi.

6. Pathian thu zilna lam ah Nu leh pate mawpuakna:

Nu leh pa te'n Pathian Thu zil ding ah chate a dawisak nau hi kipakum tak a hi. Ahinla, nu leh pa sawl hat ziaak a h'em, pawimaw sak ziaak a h'em ah chate va zilsak guat ham ham ti a um thei ah, zia chu

vang a phapen hi ding in
ginchak a um puai. Nu leh
pa leh midangte sawl hat
ziak ah va zil te hi a lawting
tak tak zolo a bang sek ui.
Ziaziak ah chun nu leh pa
ten le i chateu Pathian Thu
zil i dawisak khak ua a hi
inle mawk sawl zianglo in
Pathian dawng zing kawm
ah panlak zawk ding a hi.

Chuleh, hiat ding
ah pawimaw khat chu,
Pathian kona hi lam chuam
chuam ah um thei a hi. Nu
leh Pa te mang ah Pathian
kona le chang thei ahia,
lawi leh pai leh Kochuam
puitute mang ah Pathian
kona le um thei kit a hi zia
in pilvang a ngai ma ma hi.
Pathian in i min lam ah ei
hung ko khello ding ahia,
ziaziakchun kona dawng ah
i kihiat a hi chun mimal ah
pauchapna tawh Pathian
dawng in, *nu leh pate'n le i
chateu a ding ah i pauchap
piak ban ua theitawp sua
ah i tawsawt zing ding uh
a pawimaw hi.* Chuleh, a

hung zilzaw phat ua leh le
a sepna ding uh buai pi ah
tai vial zianglo ding a hi.
Pauchapna tawh Pathian
zai ngak ham ham kizil zel
ding a hi. Pathian kona
changte chu a hun tak in
Pathian in a sep ding uh a
pe ziang sek hi ti gingcha la
puai tiu.

7. Kochuam mathîl:

Tu dinmun a hin
Pathian malsawmna zal in
i kochuam un le Pathian
Thu zil zo leh a zillai i nei
phachuam hiai hiai tau
ah, taksa leh thagau lam
ah Kochuam masawmna
muthei khat le ahia kipak
a um takzet hi. Maban ah
le zil zawm to zel gua hitiu.
Zia chu a hizing lai in, i
tepte zui ding ua pawimaw
khat chu i Kochuam uhi
mi i tawm deu nalai ua,
i dawi hun hun ua sepna
hung um zianglo maithei
a hi. Ziagual hun a chu le
lungawi dan leh kikhawmpi
thupûkna zadan i thiam
guat chiat ding uh a hi.

HINNA VÂK

Pathian zal in Kochuam le hung khangto zel intin, a zil zo sa leh hung zil to zel dingte a ding inle lampi chu hung kihawng zel ding in kinep a um hi. Kochuam tin inle Pathian Thu zil zo sa te leh a zillai i nei teu hi panpi dan leh mat phatchuam dan i thiam uh a pawimaw hi. Kochuam maban ding thîl thiam kawm in Kochuam tin in Pathian Thu zilzo sa te, a zillai te leh zilnuamte puihuai dan i thiam uh a ngai hi. Chutileh taksa leh thagau lam ah i kochuam uh dam intin, khangto deu deu ding i hiu.

Thukhâkna : Tangphai Provisional Synod hi Presbyterian Church of India (PCI) nuai ah Synod khat hi ding ah guanggal a hi laitak ahia. Pathian zal in a milip (population) tawm maleh taksa leh thagau lam in i masawn ma mau ah, Synod kisanpi umtak dinmun in i hung umthei tau a hi. Zia

chu Pathian mapuina zia ah Kochuam mi zosia pankhawmna leh kithutuakna zâl bep a hi.

Bible ah i mu gual un Pathian Thu hin thil a hithei ah, bang lam lam a ding inle a phachuam hi (Heb. 4:12; II Tim. 3:16). Ziaziakchun, mimal leh kochuam tin ten theitawp sua ah pan i lak zing uh a ngai hi. Kochuam hi tu sang ah masawn zaw diak ding leh ginna lam ah detdo tak leh kingakna tâk a hung hithei na ding a chun Pathian Thu zilna lam ngaikhawk a pawimaw hi. Mi zosia ten va zil theilo i hiziak un, a zillai te leh a hun zil zel dingte tawsawt dan leh etkawl dan i thiam ua, i kingaikhawk tua uh ngai a hi. Chutileh, i kochuam uh hung masawn intin, ginna leh nasepna lam ah le nasa zaw diak ah hung khangto in, midangte â ding ah malsawmna hung hi to zel thei ding i hiu. Zia ding a chun simtu zosia Lalpa'n malsawm ta hen.

“INDIA GAM POLITICS LEH GAMTHAK NASEP ZEL DING DAN”

~ Nk. Manjolie
D.Th., Social Analysis Deptt.

India gamah politics leh ngaidan kitheng (shifting political tides and ideological currents) in sakhua lak ah a neote (religious minorities - Christian, Muslim etc.) a dinga haksatna chuam chuam ahun tun zel ah. India gam ah political party vaihawmlai leh tuchung election ah le tel tin ah um vaihawm sunzawm kit ding BJP (Bharatiya Janata Party) te hin khawtang (social) leh sum le pai chiadan (economic), chuleh, thil ngaitua dan leh thil dan nasatak in ahun su danglam ua. Zia chun gamthak nasep na lam le nasatak in ahun su danglam ahi. Ziagual hun haksa ahin Christian gamthak nasep dan leh haksakna thak hung kisiam dawkte hi et thak/zil kit a ngai un ahi. Political party vaihawmlai te nuai ah haksatna hung kisiam zung zung lak ah hin Kristianten ngaituana thak leh thil et dan thak nei i pawimaw tau ahi. Ziaziakchun, ziagual hin vak ngaitua khawm hitu.

1. India gam politics hung ki sêkto dan:

Tulai India gam dinmun ah kipat ah Khristian gamthak nasepna lam ah haksatna leh a subuai thil tamtak lak ah hiat ding ah a pawimaw pani te chu: BJP (*Bharatiya Janata Party*)

hung khanglian zel leh Hindu gam din a tupnau, chuleh, khawvel pum huap ah sumdawn dan thak (*Neo-liberal economic policy, globalization ti a le hiat*) te hi ah¹. India gam Dan pi (*Constitution*) in India mipi zosia sakhua zalenna a piak lai in, Hindu

HINNA VÂK

kulmut pawl RSS (*Rashtriya Swayamsevak Sangh*) te chun, zia Dan pi kâl ah mipi zosia hi Hindu sakhua hisak a tup pen uh a hi. Sakhua zalenna subuai thei thil tamtak le a la bawl sek tau a hi. Muslim te leh Khristian gamthak nasepna do na ding ah *Ghar wapsi* (*Hindu ah kile kitna*) mangcha in Khristiante leh sakhua neu dangte hawle a la sawisa sek uh a hi. Zia bep chu hilo in, kum 1991 ah globalization (*economic liberalization*) nasatak ah India gam ah a hung kipatto lai ah kipat khan, Northeast India lam ah i leilung hausakna te'u (natural resources) hi India khawvel huap ah sumdawwna ding in a hung pawimawi ma ma ta². Khantona (Development) pansa in thuneina, lopina

leh hausakna nei theina ding kinepna sang tak pia in Government leh private company te chun mipi a hun thutiam sek un. Ziagual kinepna ziak a chun, leilung hausakna tamtak umna gam, ei Northeast lam ah private company ten nasatak in a hun zuan ui. Zia company-te haw hin lawkna leh masawwna tamtak a nei ui ti muthei in a um a. Himaleh, i leilung hausakna'u thing leh go, gam leh tui suksiat ah a um kituak in eimi te hin lawkna leh khantona i nei tak tak nau em ti hi ngaitua a ngai a hi. Ei thingtang mite hi i gam le go te tawh kizawpna dettak neite ihui ah, thing le go leh i gam uh hi i hinkhuau vawptu a hi. I nisin pawimawteu i lâknau ahin, nek leh chak i hawl na

1. M.M. Thomas, "Christian reflections on Indian political developments," *Gospel to the Nations: Reflections on Christian Political Praxis* 14/1 (January/March, 1997): 17.

2. Lalrindiki Ralte, "Ecological Crisis in Northeast India: A Theological Response from the Underside," in *Search for a New Society: Tribal Theology for Northeast India*, edited by Yangkahao Vashum, Peter Haokip and Melvin pereira (Guwahati: North Eastern Social Research Centre, 2012), 311.

pen uh le a hi. Ziate haw suksiat ahi chun, i hinkhuau leh i hi nau (identity) le suk mangthai in um ding a hi.

India gam ah Khristiante a do na pen uh chu gamdang sakhua ahin, a ziltilna inle gamsung ah kiunauna a subuai hi atiu a hi. Anti-Conversion law hile Hindutva propaganda sukhatna ding ah guanggal a hi. Ziaziakchun Khristian Mission nasep zosiate hi Khristian ah puilut na ding ah malakna ahi ti'n le a ngai ua. Ziagual ma chun FCRA (*Foreign Contribution Regulation Act*) tawh kisai ah buaina hung kisiam haw hile gamdang ah kipat panpina muthei taklo na ding ah guanggal a hi. Chuleh, mi tamtakte'n Khristianna a dodal na ziak uh hi zilchian ngai hi in a kilawm. A ziakchu Khrista leh Kristianna India gam ah i hiatsak dan uh hi a fel

kimlo deu hi in a kilang. Khristianna i kizilsaknau ah chun, Khristian hilote hi milim hote, gawtmun zuan di, sakhua diklo i ti sek ua, zia hin mi tamtak lungthim a suliam sek in a natsak a hi³. Zia hi RSS-BJP te hin matchak ah mang in Khristiante huatna a neisak hi. Ziaziakchun Khristiante hi kingaitua kit ah ki et let a ngai in, gamthak nasepna lam ah kisingsakna thak leh kiziltil dan thak nei a ngai ma ma tai.

2. Nuainung Theology :

Pathian mission nasep dan chu chunglam ah kipat hilo in nuailam ah kipat a hi. Philippi 2:7 ah chun Pathian in a lopina zosia taisan in mi nuainung pen gual in ahung kisiam a. Hukdamna na chu mi nuainungte lak ah - damlote, Jentelte, naupangte, numeite, thingtang mi gentheite leh

3. Muthuraj Swamy, "Doing Mission in Context: Christian Mission as Invitation in contemporary India." *A paper from the Mission Theology in the Anglican Communion Conference, ECC Bangalore, 16th - 21st October 2016.*

HINNA VÂK

thilsiam zosia te lak ah ahun pan hi ti i he ui. Jesu mitmu ah chun mi nuainung pente haw hi mi hausa, thuneina leh thilhitheina neite sang in Pathian in a ngai pawimaw zawu hi ti a ki mu a hi. Ziaziakchun taksa hinkhua ah gitlona leh eisuse thei thil zawna ding leh Pathian in mihingte hinkhua a guanggal dan diktak neitheina ding ah chun, mission na hi mi nuainungte lak ah pat ding a hi. Adiak ah religious fundamentalism, globalization, kikhenna (communalism), gam leh leilung/thilsiamte suksiatna (ecological crisis) te'n haksatna tamtak achung ua a hun tun sakte lak a hin, mission na chu pat a ngai hi⁴. Amau haw hin Pathian in hinkhua a guatpiak gual dantak a neithe nading un, a dinmun uh susetute

hi Khristian mission in a kibuanpi a ngai hi.

Chanchinpha chun kitawden nate, dinmun kibatlonate, zawngkhalte nuaisia nate, Pathian thilsiam susete haw hi a dodal in⁵, zia hi mission bul kipat nading chu a hi. Hiattheina thagau panpina in India gam ah mission nasepna hi gunchu tak ah et let a ngai hi. Jesu'n a thugen ngaitha ding ah hungkhawm mipite kiang a chun, thil umdan diktak a hiattheina ding un a dinmun chiat uh gunchu tak ah zil ding in a hil hi (Lk.12:56-57). Jesu'n mipite a hil gual a hin, tuni hin ei un le khawvel ah thil tung zinglaite haw hi i hiatthiam theina ding un Pathian thagau panpina tawh zilchian a ngai hi. Zia chun i mission nasepna ding dan

4. Lalrindiki Ralte, "Mission from the Margin: Analysis of the 2023 Conflict in Manipur, Northeast India." Presentation at CWM Pre-Assembly Meeting, Bangalore, 20-22 March, 2024.

5. Ivy, *Voices from Narmada: Doing Ecofeminist Theology* (Delhi: ISPCK, 2009), 206.

uh hi banggual ahi em, kuate kiang a h'em, khawi ah a h'em, bangtik ah a h'em ti ei hiatthiam sak ding a hi⁶. Zia chu i hiat ahileh Pathian hepina mission, lungsiatna mission leh i bawldi tak uh chu supiting thei ding ihiu. I ginnaul leh Pathian thu i hiat dan uh hin i mimal thagau leh hindan ei mapui chauh hilo in, khawtang, sum leh pai chiadan, politics chungchang leh mission i hiatdan uh le nasa tak in a puihuai hi⁷. Khristian mission hi hinna dinpitu ahin, zia hinna chu thina leh siatna lak ah masawn theilo a hi. Zia gual ah mission hethiamtu chun, tu ah dinmun diktak leh a ginna kizawp dan a hiatthiam sak in, Pathian a ding ah ma la ding in a hiatsak sek a hi⁸. Nisin hinkhua buaina leh haksatna kal ah mission

na lawting tak ah septhei na ding achun, Bible leh theology i kingakna pen uh hi a vel vel ah et kit zel a ngai hi.

3. Tulai hun leh Khristian Mission nasep :

Khawvel dinmun kisang danglam zel gual ahin Khristian Mission le a kisang danglam a ngai hi. A ziak chu khawvel buaina leh haksatna hepaha hetlo ah Mission nasepna chiapi ahi chun, lawtinna diktak a um theilo a hi. Doctor in natna a hiatchian phawt lo chun, a damdawi di a piak theilo gual in, Mission na le zia gual ma chun haksatna leh mamaw diktakte het masak phawt a ngai hi. Ei Northeast lam ah natna i nei te'u vak thilkhawm hitiu. A diak in tulai ah hin gam kichu, thuneina kichu,

6. Ralte, "Mission from the Margin: Analysis of the 2023 Conflict in Manipur, Northeast India."

7. Gabriele Dietrich and Bas Wielenga, *Towards Understanding Indian Society* (Tiruvalla: Christava Sahitya Samithi, 2017), 77.

8. Sallie McFague, *Super, Natural Christians: How we should love Nature* (Minneapolis: Fortress Press, 1989), 12.

HINNA VÂK

nam leh phung min ah gam tum del kibuaina a hung pung deu deu ah. Da um tak in zia kibuaina haw hi political leaders te'n chi leh nam kikhenbe nading in a siam ua, mipite'n a kihinsua nading ua a thil mamaw teu leh a chanvo diktak uh le neitheilo leh, a dinmun uh siatdan le kihechian theilo khawp in a lungthim uh a subuai ua. Zia zing lai hin, India gam vaihawmtu leh thuneitu RSS-BJP te'n private company te hawn a nawp dan dan ua i gam leilung hausakna a lak theina ding un lemchang a siampiak ua⁹. Tu leh tu i State ua kibuaina hile bangchan hem ah chu Neo-liberal economic policy in i kihinsua nau, i gam un ei piak uh nei le go – lou, bu lei, gam, tuithiang leh gancha, ganhing haw a suksiat zia a hi. Zia haw

cheng suksiat leh lakpiak ah a um chun, a um nalai sun cheng hi kichu a ngai ta a hi. Ziagual kichu na chun tu dinmun kibuaina huaise tak hi ei tun a hi.

Ziaziakchun, Kochuam leh Khristian pawl chuam chuam te'n genthei leh haksate kiang ah chanchinpha ti takzet ah a tut theina ding un, government policy te leh kipuak dan, chiaphung te haw hi gun tak ah a zil ua a hiatchian uh a ngai a hi. Kihinsua nading ah nisin mamawte (*dailysubsistence need for survival*) humbit na ding in malak dan feltak nei hi mission in a tup ding a hi. Mission strategy hin thilsiamte leh nek leh chak hawlina lam (*food security*) hi a ngai pawimaw takzet a ngai hi. Zia humbitna na hi mission strategy in kimang henla, pan kilakhawm thei

9. Signe Leth, "Understanding the complex conflict unfolding in Manipur," *International Work Group for Indigenous Affairs* (21 Dec 2023), <https://www.iwgia.org/en/india/5329-understanding-complex-conflict-unfolding-manipur.html> (18 Feb 2024).

leh, gam kichu leh chi leh nam ah kibuainate haw hi a dai deu thei diam? Thilsiamte leh nek leh chak di umlona a chu, kua chi, kua nam thuneina nuai ah le kisuakcha diaklo ding a hi. I nei sun cheng uh hi, i kihinsua chiat thei nading ua kihawp thiam dan zil a ngai ma ma takzet ta, lushei pau ah *'sem sem dam dam, eibil thi thi'* ti dinmun ah ki ding zing ahi ti hiat a ngai a hi.

Dinmun haksatak leh thepna nuai ah, ginna leh kinepna thak neitheina ding in Bible ah thucha tampi muthei a um a. Himaleh, hamphatna lam tawh kisai ah Pathianthu kizilsakna (Prosperity Theology) hi ei Northeast gingtute lak in a tam ma ma ziang a. Zia hi globalization chawisang tute'n khawvel hausakna sum leh pai delna lam ah thiamchanna'n a mang sek

ua. Zia hi i lak ua gingtu tamtak lak ah te, theologian pawl lak a te, missionary-te lak ah, chuleh, kochuam sung in le zia hamphatna leh lemchanna globalization in a hun kentelte haw hi muthei leh hiatthei in a um a hi¹⁰. Himaleh, ziagual lemchanna haw hin migenthei leh nuainungte thawkna leh haksatnate ngaisaklo leh mutheilo in a umsaklo ding a hi. Neoliberal globalization in mi khenkhatte dinmun nuam tak ah a umsak lai in, zia nawpsak na hin mi nuainungte haksatna leh thawkna a supung deu deu hi ti hiat a pawimaw'i.

Politics dinmun kisang in sum leh pai chiadan dinmun a hun sudanglam sek ah. Zia sum leh pai hausakna ding a hin leilung hausakna nasatak mai in a hun sukiam ah. Zia hi Khuga dam siamna a le muthei in

10. Lalrindiki Ralte, "Social Analysis in the Context of Neo-Liberal Globalization," in *Methodological Issues in Theological Research: An Exploration vol 5*, edited by Limatula Longkumer (Serampore: SATHRI, 2022), 260.

HINNA VÂK

a um hi. Leilung hausakna sukkiamp bep hilo in a kîm vel ah chengte hinkhua, chuleh, nek leh chak hawlina lam a susia in a subuai a hi. Tuithiang a mu sek nau lui, chuleh, a tui nâkteu hawleh a gam ah chengte thuneina ah kipat lakpiak in a um a. Tu masang ah a thawn ah a mu sek uh tuithiang chu tuhin vang bazar ah private business company-te chung ah a kingak uh a ngai ta. Zia bâk ah chun, Khuga dam kimvel ah kichawlimna siam ahin, restaurant-te, park te, resort-te sak a hi. Ziate hi a gam mi tamzawte â ding ah phatchuamna tak tak a tutpua. Zia malak ah chun, a gam uh, lo leh huan, bulei munte chu khawpi ah cheng sum neite/mi hausate nawpchenna ding

ah siam ahin, suksiat a hung hitai. Ziagual hindan hin, a gam neite thawkna leh haksatnate mu theilo leh thawkpi theilo in ei siam a hi. Ziagual dinmun ah chun a gam neite chu dawitelna him him neilo in a hinau (*identity*) dengdel tak in a umsak ta a hi.

Mi chansiate thawkna leh gentheina ah thawkpina leh chanpina hin eima ah tulai hun a ding ah phatchuamna neilo leh dik beklo ngaidan leh thil thildan a la um sa te chu hun sudanglam ngei ding a hi. Ziagual hiatthiamna thak, mi nuainungte thawkpina, ngai pawimawna leh a malam hun ding ua kinepna pe thei Mission nasep hi i mamaw nau a sang talua tai i gam uh hin. Amen!

Sungkuan hi khawi ah kipat hung kipan a hi em? Tangval in Nungak a ngai lai ah kipat hung kipan a hi.

~ Sir Winston Churchill

“JESU NUNGZUI DIKTE LEH SUMDAWNG NA DIK”

(Right Kind of Business and True Disciples
of Jesus Christ)

~ Rev. Th. Mangthianlal
B. Aijalon

Himaleh, hausak nuamte chu thepna'n a lut sek un, thil ngolhuai leh a hi'sethei nopnate thâng in a awk un, ziate chun siatna leh manthâina'n mite a tum lutsak sek ahi. Dangka sum ngainat hi gitlona chitin bul ahi ngal a; khenkhat in hausak nopna ziakin ginna chu jamsan in, amau lungngaina tam tak a kisunkhum sek uh ahi. ~ 1 Timothy 6:9-10 (cf. Kolassa 3:17)

1. Thumapui:

Jesu nungzui leh sumkawlei (sumdawngna) hi a kituaklo na bang ma a um puai. Ahin, tulai ah i gam ua i buainapi pen khat uh chu kani lei bawl (*poppy cultivation*) hi a hi. Banggual in kani lei bawl a phai ti leu hinle a phalo a hi. Pathian dawilo leh lungnatna le ahia, gam leh gua in a thuak pua, mi hinkhua leh taksa le a susia, Jesu nungzui i hinau le khawvel hiat in a sumelsia

a hi (Romte 2:24-25). Jesu nungzuite'n sumdawngna dik leh diklo i hiatchian ua, i zui ding uh hi pawimaw mama a hi. Zia hin Jesu nungzuite sumdawngna dik leh diklo chawmcha gen ding ihu.

2. Pathian dawilo sum dawngna (Business that dishonor God):

Bailam tak ah vak gen ding in sumdawngna chu sum suk punna hi a hi mai hi. Sumdawngna hi chi chuam

HINNA VÂK

chuam a um ah. Khenkhat chu ahi leh Pathian lungnatna, mihing â ding ah le phalo, gam leh gua a ding ah le phalo leh solkar kivaipuak dan in le a phalo a um hi. Sumdawngna dang ahi leh chu a gam solkar vaihawm dan tawh le kituak, i gam leh gua tawh kituak (*environment friendly*), Pathian thu leh chanchinpha tawh le kituak leh mihing sia leh pha hetna leh taksa damtheina tawh le kituak ah sumdawng na a um hi. Hausak a pha, ahin Pathian dawilo chu sumdawngna phalo ah hausakna leh hausak nawpna ah hinkhua mat hi a hi. I kochuam sung, gam leh nam sung ah Pathian dawilo gual ah sumdawngna haw zosia hi sukbei ding a hi. Kochuam leh mitin mawpuakna a hi. Jesu nungzui tak tak te'n zia haw ah chu a kisubuaklo ding uh a hi.

3. Pathian dawigual sum dawngna (Business that Glorify God):

Business As Mission (www.businessasmission.com)

ti khawvel pumpi ah movement khat a um ah. Lausanne Movement (*Billy Graham in a la pat*) nuai ah a bâk lianpen zia chu Khristian sumdawlte kipawl na ahia. Keile North East India in a Global Ambassador uh ka hia. BAM Global Movement ah Chairman Mats Tunehag in a lekhabu zik "Know Your BAM A-Z" ah Pathian dawigual sumkawl veina chu zia gual hin a hiatchian thei hi:

- 1) Pathian Pakhat leh Lal Pakhat chu ging ah Messiah chu sumdawngna leh sumdawngna mun (*marketplace*) ah Lal a hi ding a hi. Sumdawng dingdan leh sumdawng na mun a chun Lal Jesu in bangkim ah thu nei in, vai a hawm hi.
- 2) Pathian lopina (*God's glory*) leh khawvel ah chanchinpha puanzakna (*world evangelization*) ding ah sum hawl ding a hi;

3) Van chaw tute (customer) phatchuam na ding leh khawtang (community) â ding ah pha ding ah sum kaw l vei ding a hi;

4) Sum pung mu na ding ah leh eima sum leh pai ah kiningting (*surplus to flourishing*) ding in;

5) Gam leh gua (environment) khawtua leh phatchuamna ding ah; leh

6) Thagau lam ah masawna ding leh lawkna ding ah.

4. Jesu nungzuite'n panlak thak ding dan kani (Poppy) tawh kisai ah:

Kani (Poppy) tawh kisai ah 1 Timothy 6:9-10 na kigen pen hi a thak ah ngaitua ngai a hi:

1) "hausak nuamte chu thepna'n a lut sek un"

2) "thil ngolhuai leh a hi'sethei nopnate thâng in a awk un"

3) "ziate chun siatna leh manthâina'n mite a tum lutsak sek a hi"

4) "dangka sum ngainat hi gitlona chitin bul ahi ngal a"

5) "khenkhat in hausak nawpna zia in ginna chu jamsan in"

6) "amau lungngaina tam tak a kisunkhum sek uh a hi"

Zia a chung ah cheng hi sumdawngna phalo kani lei bawl (*poppy cultivation*) leh zawkna haw genna le ahi ngal hi. Dangka sum ngainat hi gitlona chitin bul ahi tak zet a hi. Hausak nawpna zia in Jesu nungzui hina i jamsan ua. I ginnau ah lungthim leh suangtuana thiangtho haw chu bangmalo mai in i kawi uh a hi. Gam leh gua Pa Pathian in ei piak, a lopina gingo tute lak ah sukatna ding leh gan leh thai haw (animals, vegetables and plants) supung ding ah mawpuakna ei piak (Thilsiam thu 1:28) chu i subuting zo talo uh a hi. Zia chun, lungngaina tam tak tuchung ahin i kisunkhum uh a hi.

HINNA VÂK

I panlak thak ding dan uh leh Pa Pathian kipakna leh malzawlina i dawnkit theina ding uh chu zia gual hi a hi:

- 1) Sum muna phalo i bawlteu ah kisik ah sumdawngna Pathian lopina ding leh midang a ding ah pha ding haw bep i bawl ding uh a hi.
- 2) Gam leh gua Lalpa'n i etkawl (*stewardship of land*) ding ua ei piak haw hi thiangtho tak ah Pathian kiang ah kipak pum leh lau pum ah i etkawl ding uh a hi (*Thilsiam thu 1:28 cf. Philippite 2:12*).
- 3) Gam leh leilung i awpkhum uhi Pathian a a hi, ei uh hi a enkawltu mai mai ihu (theology of land) ti hi i hiatchian uh pawimaw a hi. Zia i mawpuaknau i bawlkhial ua leh suak leh sal leh galtai ah Pathian in ei kawi thei a hi. Tuchung ah i galtaina zia pakhat uh le a hi (*midangte'n thachimit leh i gam ua*

pat nawdaw ei guat u chu thuchuam atai). Pathian lau pum ah, a doigual ah gam i etkawlllo ua, kani lei bawlina leh sumdawngna thanguai ah i mat ua leh Lalpa lungnatna i chung ua tung to jel nalai ding a hi. Dan tak leh i gam leh gua teu hi midang kiang ah le Pathian in pesawn thei nalai a hi ama dawigual ah i etkawlllo ua leh.

- 4) Sumdawng dan leh sumdawngna mun zosia hi Lalpa Lalna mun leh lopina ding ah i mat ding uh a hi. Pathian kipakna ding leh midang â ding ah damna leh a pha ahi chun zia haw chu i chiazawmpi diu a hi. Zia chu a hilo chun, i tawpsan siksek diu a hi. Siatna huaisia i mimal leh gamsung ah a tunlona ding in.
- 5) Chanchinpha tawh kituak ah sumdawng ding a hi. Chun, chanchinpha puangzakna ding leh Lalgam keklet na ding ah

sum leh pai i matthei na ding ua sum i siam ding uh a hi (*do business according to God's will and the gospel*).

- 6) Ei ma mimal sum leh pai ah kiningtinna ding ah sumdawng ding a hi.

Mahatma Gandhi in ziagual hin a la gen hi. *"Khawvel in mihing in i mamaw zosia a ding in ei pe thei hi. Ahin i dugawl leh huaihapna sukbutinna ding in vang a kiting puai."* I mamaw leh pawimaw haw a ding in Lalpa'n kiningting ah gam leh gua ei piak a hi. Sum Pathian dawigual ah suk pundan zil in thiam leu hin Lalpa'n khawvel ah hausakna le ei pe ding a hi. Kolassa 3:17 in hi ti hin a gen hi, *"la hi tapo uh thugen a hem, thil hi' a hem, ama ziak in Pa Pathian kiang in kipak thu gen kawm in, Lalpa Jesu min in hiu in."* Ziaziak a chu sumdawngna Pa Pathian kiang ah kipak thu gen zing kawm ah i bawl theilote chu haisan in, Lalpa Jesu min ah i

bawl theite chu bawl leu hin Lalpa kipak na leh ei uh a ding a le malzawl na hi te'i ding a hi. Khawvel ah sundawngna pha leh hawi zia bang tampi a um lai ah bang ziak ah Pathian dawilo leh solkar leh i nam in pha a saklo sumdawngna bawl tei tei ding i hiu em? Jesu nungzui dik leh diklo i hi na i sum hawldan ah kipat hi kilang nasa mama ding a hi. Jesu lungthim leh Bible ah ei hil dan tawh kituaklo cheng tuni hin ama ang in la'n in kawidawk hitiu.

5. A khakna ding in:

Matthai 6:33 ah Jesu'n *"a gam leh a dikna chu hawl masa tau in"* ei tia. Zia chu i bawl a hi chun *"thil zosia chule piak belap in um in lau"* ti ei tiam a hi. Ei uh gingtute'n Pathian mai leh a gam leh dikna hawl masalo in, khawvel hausaknate leh sum leh pai i hawl masak ziak ua lungngaina leh manthaina kawkhuk ah i lutsek uh a hi. Hausakna tak tak leh det chu Lalpa Pathian lalgam leh

HINNA VÂK

dikna hawl masak hi a hi. Zia chun taimatna leh pilna a um ah. Thilbangkim sumdawngna malzawlna i mamaw zosia le a um ngal ahi! 1 Thessalonika 4:11-12 in hi ti hin a gen ah, *“Chuleh, thip hiau ah, nangmau na chiat ngai khawk ah, thu ka hun piak gual ua, la khut ua sep la guatna ding un. Chutichun, pawlam ah mite mu in melpha’n la tiu in, bangma le tasam pua’n lau.”* Khut ah nasepna in lawtinna, ei mimal kipakna leh Pathian kipakna um a hi. Zia chu sumdawngna bulpi a hi. Jesu nungzui dikte chun Jesu thupiak leh doigual ah sumdawng in tin uh. Nungzui diklote chun, Pathian lunglam leh chanchinpha tawh kituak a hi na’m ti lunggel le neilo in, khawvel hausakna leh du am na lam in a lungthim uh

pe ding ahiu. Sumdawngna hin nungzui dik leh diklo a khen chian ma ma hi. Pathian kochuamte’n i khang ua i mawpuaknau lianpen khat uh chu sumdawngna dik leh diklo i mipite kiang ah zil sak hi a hi. A khakna’n, sumdawngna Pathian dawigual chu Lalpa lopina tunsak, chanchinpha puangzakna matchak, gam leh gua damna ding, Lalpa kipakna nek leh chak kining ting na ding, genthei liangvai te’n le phatchuampi diu leh midangte â ding ah le siatna hi lo ding. Zia article i sim ua pat hin Lalpa Thagau Thiangtho in i lunggil un na sem henla, sum mu na phalo pai mang in, Lalpa Jesu kipakna leh malzawlna changtâk ding ah sum mu na dik leh pha tudet hitiu.

Mihing leh sazawng têna chu ze det a nei leh neilo ah, a tup sang dan ah, a hepina letdan ah leh a lungsiatna huapzaw tiang in a kichianpen hi.

~ D.N. Jackson

“KHANGLAITE LEH MANI KITODEL”

~ Ty. Lianmuanthang
General Secretary, CKKP

Khristian Khanglai Pawl te hi Kochuam a ding ah khut leh kêng pawimaw tak a hi. Kochuam hi insung khat gual ahia, insung ah chate haw kingakna tâk hitheina ding ah chun mani kitodel thei a ngai a, kitodel theilo cha chu insung a ding ah kingakna a ting zolo a hi. Mani kitodel theilo Khanglai chu Kochuam khut leh kêng hi a hung haksa thei ta, Lalgam na i sepna’u ahin a bîk in Khanglaite a ding in mani kitodel thei hi thil kûl leh pawimaw mama khat a la hizing hi.

Gam changkang zaw Western Countries lamte khin a chate’u haw (*eilam in piting ah ki kawi nailo*) hi In chuam in a um sak pai u’a, piting ding a dawina zia uh a h’em; In chuam ah um thei ding kum a tingtâk zia h’em haw a la hisek hi. Zia haw lak ah a ngai pawimaw pen uh chu Financially in mani kitodel thei a hi ta’i, ti hi a la ngaikhaw mama’u hi. Ei uh chawndan tawh kibang puan a, himaleh tulai khanglai te’n i

ettawn di pawimaw chu mani a kitodel thei guat na’u hi a hi. I chenna mun zil in sep leh bawl thei tam dan vang kibanglo maithei a hi.

Khristian Khanglai Pawl te hi, **“Thilpha hi dingah hukdam”** ti thupi nei ah kalsuan zing ihi’u a, taima leh thadalo in titakzet ah Pathian nasep a ngai hi. Khanglaite mani kitodel theina ding ah thil pawimaw khenkhat te vak thîlkhawm hiti’u.

HINNA VÂK

1. Pathian muang ding:

2 Thessalonite 3:10b na chun, *“Kua’nle na a sep nop lo chun, nêkle ne kihen”* ti’n ala gen hi. Pathian in mihingte hi nasem ah nêk muding in Eden huan ah kipat khan i gitlona’u ziaak in eila pawtsak ta, haksak ah gim leh chawl ah nasem ding in eila ti a hi. Ziaziakchun, Khanglaite hin Pathian thu’n a gen hi hiat zing a ngai ah, na pha sem ah sum-leh-pai, nêkleh-châk mu hi Pathian in eila guatpiak a hi ti hi geldawk thak hiti’u. Ka umna mun in a zil puai ti mai in suanlam siam a ting pua, nu-leh-pa sepdaw sa bep bep ne um hi jachatna ngai in ei siamtu Pathian muang in kalsuan zing hitin, a thu leh La te ah kibulphu in ama’n lampi ei siampiak ding a hi.

2. Mani kithunun:

Mani kitodel theina ding a chun mani kithunun theina hi thil pawimaw

tak ahia, mani hindan leh tawidan hawitak ah chingtup zo khanglai hi a ngai a, kukal a ngai hun ah kua’n ei thuhillo inle kukal tak ah pang zing, thatda theina leh i thilbawl ei lunglut saklo ziang thei thilte taisan ngam, mani kitodel ut na ziaak ah mi sep nuamlo sep ngamte hi a hi. Ahinla, i nasepte hi Pathian dawigual a hi na’m ti ki et zing a ngai bawak hi.

3. Hun Mat dik:

Khawvel hung changkang zel in Khanglaite lak a hin hun matdan dik hi thil haksak mama khat a hung hita’i. Khawvel changkangna thilte ziaak in sepdaw umlo in hun a mawak ah bei ziang hi tulai khanglaite’n a maitua zing uh chu a hi. Zia haw lak ah kipat ah Khanglaite hi kivêng thiam a pawimaw, mi zosia hi nikhat ah dakkal 24 vek nei ihi’u a, mani kitodel leh Kochuam ah pangnuamte i hi ziaak un

hun matthiam ten a ngai hi. Hun mat thiamlo zia in Kochuam ah Pathian nasepnate haw hi a kipak um zinglai in, insung mite chung ah haksatna tuntu le a la hithei sek a hi. Sep leh bawl dingte a hunbi siam thiam a, a dakkal chet chet i tep theilo inle a hun chet chet ah thil bawl kiziltîl ding a hi. Hun mat dik theina ding a le mani kithunun zaw a ngai hi.

4. I Talent leh thiam zawng matthiam:

Pathian in a thilsiam zosia hi pha a la sa mama a, a thilsiamte lak in mihingte hi eila siam chungnung bîk hi. I mêl leh puam a kibatlo gual in i talent, i lunglutna leh i thiamna lam a kibang pua, zia haw chu bang a hi em ti ki hetdaw a ngai hi. KKP member ah pangthei ta te hin i talent leh i thiam zawng hi he ah, mani kitodel theina ding ah Pathian in eila malsawmna a la hi. I talent te kibatlo zia in nasep

thei lam le a hung kibang tapua, Pathian in gim leh chawl ah nasem ding eila ti maleh i theina leh thiamna zat chuam chuamte haw hi mani kitodel nading ah eila siam piak zawk a hi.

5. Zâidaw tak ah um:

Mihingte a ding ah mani kitodel thei hi thil kûl a hi zinglai in zaidawlo zia in siatna ei tut thei baw a hi. 2 Timothy 6:10 chun, *“Dangka sum ngainat hi gitlona chitin bul ahi ngal a; khenkhat in hausak nopna ziakin ginna chu jamsan in, amau leh amau lungngaina tamtak a kisunkhum sek uh a hi.”* ti’n a la ki zîk hi. Mani kitodel ding ah sum leh pai hawl na panlak a ngai zing lai in zia Bible châng in a gen hi hiatmillo apha’i. Hausakna ding bep tup lo in, i nasepna a hawilo hun ‘hem; i kitodelna di i thilbawl a lawtinglo a h’em inle Pathian dawng zing in zaidaw tak ah um a pawimaw hi.

HINNA VÂK

Khanglaite hin mani kitodel thei chiat ding ah panlak thak a ngai ma ma ta, i tâklatte haw khêl a le gen thei tamtak um in a, i tâklatte haw i zui thei chun lampi hawitak ei kawkmua ka kinem hi. *Bang hem ka sep thei? Bang hem ka law daw thei? Insung pawimaw bang ka sem thei em?* ti dawtna te hi kidawng ah lunggel siamthak in malam sawn hiti'u. Nasep da neilo in, lawting hun lawsap hun um intin, i dawidan ah thil a umlo hun le um ngêi in a maleh theitawp sua in mani

kitodel theina ding lampi ngaitua zing ding a hi. Zia gual hinkhua i hung matthei tak leh Kochuam ah i kimatnate haw hi mite'n sawiselna ei nei tapuan tin uh, thatdana kampau le kinei tapuan tin, i gim leh chawlnate genlo inle mi'n ei hetpi in, Pathian nasepna ah lamdik ei kawkmua tu lopitak hung hithei ding a hi. Mani ah kitodel thei zing Khanglai i hung hi chun insung beplo, Kochuam leh kawtâng a le mi mattâk leh hiatlaw kingakna thei i hung hi ngei uh ka gingcha a hi.

JESU'N

Juda kiang in sumbawm,
Sepaite kiang in a puante,
Arimathea khua Joseph kiang in a taksa,
Johan kiang in a Nu,
A sawlchakte kiang in thamuanna,
A nungzuite kiang in Zan An,
Khawvel kiang in Chanchinpha leh,
Pathian chate kiang in a umpina, ei nutsal piak hi.

“CHINGMEI PRESBYTERIAN KOCHUAM CHANCHIN”

~ Rev. S. Kumar
i/c Chingmei Pastor Bial

Chingmei khua hi Moirang bazaar ah kipat 8 km. vel ah gamla Cum a hi. A khua hi Moirangkhou Gram Panchayat chuleh Thanga constituency huamsung ah um a hi. A khua Malsak in Keibul, Tumlam ah Chandapur, Simlam ah Keirenphabi chuleh Mallam ah Laishoi khuate'n a kîmvel hi. 1980 masang lam in Khristian pakhat le a lah umpuai. Meitei shakhua zui ngen a hiu. Tulaitak ah zia khua hin In 145 leh mihing 1250 a um hi.

Kum tamlo masang ah khan a khua tawh kinaicha Keibul khua, In 286 leh mihing 3700 umna ah chun Reform Presbyterian Church (RPC) mi leh sa 20-30 kikal vel a um hi. Zia tak ah Pastor chu Mr. S. Amuyaima a hi. Lingsiphai ah a um lai in Upa Henzagial tawh lawipha ma ma a lah hiu. Manipur Christian Organisation (MCO) chun phaizang Meitei lakah mission field hawn ding leh missionary sawl ding a lunggel lai un

Pu Henzagial leh Pastor S. Amuyaima te chun Chingmei khua hi Mission field hi ding in 1987 kum in a têlua, Shri. T. Mangijao Singh, RPC member pakhat chu zia nâ sem ding ah chun Evangelist ding in guat a hi. Zia kipat chu Mr. Mangijao chun Chingmei mission field chu enkawl in Pathian nâ a sem hi. Pathian hepina zal in a thugenna ah kipat in Mr. N. Leikhamba Singh chun Jesu chu a Lal leh hukdampa ding in a pawm ta, a Inkuan

HINNA VÂK

un Pathian a awi tau ah, a In chule kikhawpna munpi a hi ngal tai. Kikhawpna chu Pathian in malzawl in, 1989 kum in gingthak Inkuan pathum a hung kibelas a, tichun, Kochuam chu khangto zel in Pathianni kikhawpna di mun le a kidai talo hial ziang hi. Zia hun laitak ah chun, Tuibuang Vaiphei veng ah um Nk. Manikhon lungthim ah Pathian in thu gen in, Chingmei Biak-In sakna ding ti in pan a hung la, 1989 kum in Head Office lam in Chingmei ah gingthak Mr. N. Leikhamba Singh gam bekkhat (7 point, 3045 sq. ft.) a chawdawkh ah, a kum ma ma ah zia tak mun ah chun Biak-In (thing ah kisa) 15/30 ft. a lian sak daw a hi. Evan. T. Mangijao te Inkuan le zia Biak-In huangsung ah chun a chenglut ui.

1992 kum ah Frontier Mission Society (FMS) chawpna nuai ah, RPC School ah Evan. -cum- Asst. Teacher ka seplai in, Evangelical Organisation Church (EOC) Head Office chun semkhawm

ding ah chial ding in, Pastor Khupneithang chu ka kiang in a hung sawl a. Zia ei chialna chu kenle ka pawm ngal ah, tichun, Evangelist ding (kumkhat sung etthâk di) in April 15, 1992 ni ah kipat in guat in ka um ngal hi. FMS lam ah haina ka siam zaw in, EOC Evangelist ding in ka kipia tai. Hun chawmlo kâl in, Pathian in ka nasepna malzawl in, Chingmei tawh kinaicha Chandapur khua ah kipat in gingthak Inkuan pathum ei pia. Chandapur ah kipat Christian masapen chu Salam Tomcha Singh a hia, ama hi Evangelist T. Mangijao Mo Salam Borni Devi pianna pa a hi. Chandapur khua ah Mr. S. Tomcha In ah chun Preaching Station siam in Pathian nâ ka semu'i. Zia hunlai ah chun Pathian hepina zal in Chandapur khua ah kipat in khangdawng gingthak 17 ka kibelasu'i. 1993 kum in Mr. S. Tomcha In chu kipawlkhawmna mun ah siam in Pathianni kikhawpna'n ka mang seku'i.

1994 kum ah chun Chandapur ah Kochuamte mamawna ziaak in Office lam in gam (9 points, 3915 sq. ft.) a In tawh kithua a chawdawk ah, ziatak In ah chun kei leh ka Inkuante chenglut ngal in zia In ah chu pansa in Pathian nasep ka sunzawm hi. EOC General Assembly 1995 kum ah Rev. Khaizakham leh Rev. Dr. Lambawi Vaiphei te chu Executive Secretary leh Officiating Minister a hi lai un, Pastor hi ding in EOC Central Church ah Feb. 12, 1995 ni'n namdet in ka um hi.

1994 leh 1995 sung in gingthak, khangdawng khenkhat leh Inkuan pani ka kibelapu'i. Amau lak ah (L) N. Thambaljao Singh chapa N. Nungshibabu Singh chu Kerala lam ah Pathian thu zil ding in Rev. S. Lalpi chun a sawl hi. 2008 kum in Biak-In hawng in zi a nei hi. Tuhin Imphal ah Kochuam dang Biak-In phudawk in pan a la zing hi. Rev. S. Lalpi ma chun 2003 kum in Chingmei Kochuam ah kipat mi pani, Mr.

H. Saratchandra Singh leh Mr. O. Ningthemba Singh te chu Kum thum sung Pathian thu zil ding in Noida, UP ah, a sawl kit hi. EOC office in Evangelist T. Mangijao chanu, T. Premolata Devi chu Trivandrum Bible College ah, Miss O. Indira Devi chu Dinwiddi Bible College, Churachandpur leh Miss N. Rasheswari Devi chu GFA Bible College, Imphal ah Pathian thu zil ding in a sawl hi.

A kum ma ma a chun, Chingmei ah kipat 2 km. leh Chandapur ah kipat 3 km. ah um Laishoi khua ah chun Preaching center hawngthei ding in Lalpa'n ei malzawl hi. Zia Preaching center hi Mr. Salam Jiban Singh In a hi. Ama hi ka Insung mi a hi. Zia kum a hin gingthak Pu S. Jiban Singh leh Pu T. Ibochouba Singh te inkuan chu Lalpa'n ei pia. Chanchinpha gen ding ah Pu T. Ibochouba Singh In ah ka chia masatpenua chun Bone cancer natna nei in lam le zawt theilo in a lah um a hi. Lungsiat a um ma ma ziang

HINNA VÂK

a. Nasatak ah pauchapna ka nei piak zaw un, Pathian in ka pauchapnau ngaitha'n, thil lamdang tak a chung ah tunsak in, a hun hun in lam a hung zawt thei ziang hi. Zia phat chun a Insungmi zosia'n le Jesu chu a Lal uh leh Hukdampau ding in a pawm tau. Zia thu hi "Muanna Aksi" mangcha'n a hung kithang ta, mitin lungthim, gingu leh ginglotute le, sukha in, gingu chun Pathian a chawihawi tau. EOC Jubilee lawm ah a Pu T. Ibochouba te sungkuan a chia hunua chun, a chanu panina min ding in Rev. T. Zuanlal zi'n Jubilee a sak hi.

Zia kum ma ma ah chun kipawlkhawmna mun ding in Pu S. Jiban Singh In chu ka mangua, Pathianni nitak kikhawpna ka nei pan theiu'i. Zia kum a hin Evan. T. Mangijao Singh Sungpa Pu Kh. Ibohal Singh leh a Inkuante chu gingu ding in a hung kipialutu'i. 1995, October tha in Laika Hausa Pu Nehkhajang leh a Inkuanpate

ei panpina zal in Laishoi khua ah Biak-In ding, gua (bamboo) ah kisa tundaw a hi. Pu Kh. Ibohal Singh chu Kraws-sepai ding ah guat ah a um zaw in Laishoi Kochuam chu a enkawl zawm ngal hi. Zia Kochuam a etkawl zia ah chun Hausapu Nehkhajang in cheng zathum (Rs. 300) thasin in a pia sek hi.

1996 kum in kei leh Evangelist T. Mangijao Singh chu ka umna mun uh ka kithengtuau'i. Chingmei ah ka kichawn laitak in Pu N. Leikhamba Singh chu Kraws-sepai ding ah guat in a um hi. Chuleh, Kwakeithel ah Tha thum dai ding zil ah Evan. T. Mangijao a pawtdaw kâl in Kraws-sepai N. Leikhamba chun Chandapur Kochuam chu a enkawl hi.

1996, May tha in Frontier Mission Society buatsaina'n Pu Kemlo Pulamte, lecturer Lamka College chun Wangoo Sandankhong ah One-Day Gospel campaign a hung bawl a. Zia ni a hin Pi O. Ibeyaima, Manipur ah numei

sângpen tawh simkhawm in Numei pathum, leh pawsal palite chun Lalpa Jesu a Lal leh Hukdampau ding in a pawmu'i. Zia ni ma ma a hin mi pasagite hi Chingmei ah kipat 30 km. ah gamla Khuga lui ah baptisma ka chansak hi. Tichun, Wangoo Sandankhong ah kipawlkhawmna mun ka siamdawk tau. Evan. T. Mangijao Singh leh Pu N. Leikhamba Singh tawh zia kipawlkhawmna mun ah chun Simhaini sin leh kikhawpna ka va neipi seku'i.

1996 kum in Mission director Rev. Paukhawkai chun Chingmei Kochuamte chu Churachandpur leh Tipaimukh bialteahthawlawm dawl ding ah chia ding a tia. Tichun, Pi O. Ibeyaima Devi panna'n Chingmei Kochuam ah kipat hawn khat chu a kipandawk tau. A hung kuandawkte chu Mission director Rev. Paukhawkai in a malat hi. Pi O. Ibeyaima Devi chun Churachandpur leh Tipaimukh lam ah Kochuam tinte kiang ah a testimony

a gen pek hi. Mi tamtakte chu zia kipat chun a ginnau siamthak ah um in kisukhat thakna ah nei in Pathian a chawihawiu'i. Pi O. Ibeyaima Devi Testimony chun Thagau lam halthakna a va tun ngei hin a. Ni li sung in tanggam ah Leijangphai, Chongkhawzo leh Thingkeu khuate ka ve theiu'i. Thingkeu khua ve lai ah chun, Meitei numei Vaiphei tangval tawh kicheng chun pianthakna a hung nei ah, Baptisma ka chansak ngal hi. Zia khualzinna hi lawting tak in malzawlina ka dawngu'i.

Bulpi lam ah puitute chun Nk. O. Ibeyaima Devi chu Pathian thu zilsak lehin Pathian nasepna nasatak ah gasua ding a hi a tiu a. Tichun, 1997 kum in EOC office chun Langgol Laimanai ah um GFA (Gospel for Asia) mun ah Pathian thu zil ding in a sawl tai. Ahinla, a kum ma ma ah chun Kuki leh Paite tualgal a hung piangdawk ah, zia buaina hin mission nasepna lam chuam chuam in nasatak in a sukha, taksa

HINNA VÂK

leh thagau leh sum leh pai natiang in nasatak in a sukha a hi. EOC ah semtute, Pastors, Evangelist leh Missionary te'n law a la dukdak thei tapuai. Zia chun a sukkhak lak ah chu keile pakhat ka hi zia in, kihinsua theina di lampi chuam chuam hawl a ngai ta, a diak ah ka chasênte â ding in. Sandankhong kikhawpna le ka enkawl dukdak zawm thei talo a hi. EOC inle missionary thak dang kuama a sawl zawm thei talo phawt a hi. Nk. O. Ibeyaima Devi in Pathian thu a zil course a zaw inle EOC chun sum leh pai inle a kithuapi zo talo a hi. Tichun, GFA ah Rev. Prim Vaiphei in EOC ah kipat phalna dawn in, GFA â ding ah missionary ding in a sawl tai.

1999 kum in (L) N. Thambaljao Singh chapa N. Nungshitomba Singh chun Jesu chu a Lal leh Hukdampa ding in a pawm ah, a kum ma ma ah chun baptisma ka chansak hi. Ama hi N. Nungshibabu suapi a hia, gingtu numei khat tawh Biak-

In hawng in a kichengu'i. M. Div., MBA (Master of Business Administration) a hia, chuleh Mizoram University ah kipat in Ph. D. (Management) a zo hi. A chiana leh umna zosia'n Pathian nâ a sem zing sek hi. Kochuam mi leh sa, Kochuam â ding mi phatchuamngai tak a hi. A inkuan un tuni tiang in i Pathian hing a ho zingu'i.

2007 kum in, EOC Executive Secretary, Rev. T. Zuanlal kawkmuna dungzui ah, Moirang ah mission field hawndaw di ti a hi zia in kikhawpkhawmna mun ding in Moirang ah Upa M. Sarat Singh In guanggal a hi. Zia kum a hin Kraws-sepai N. Leikhamba chu Chingmei Kochuam Evangelist ding leh M. Sarat Singh chu Moirang Fellowship center ah Evangelist ding ah lankai a hiu.

2009 December tha in Synod in Chingmei Biak-In sakna ding in kithuapina Rs. 50000 ei pia. Tichun, Rev. Lalhmuchhuaka, Administrative Secretary,

Manipur Area chu Chingmei ah hung in Biak-In kingakna di mun ah sung a hung phu hi. Chun, 2010 kum in Rev. Lalhmuchhuaka chun Refresher Course bawl ding in Aizawl ah ei sawl hi. Zia kum a hin Evan. T. Mangijao Singh chu a pension tai. 2011 kum ah natna huaisia tak ah nâ in damdawk zolo in a kumtuang mun di eila zawtsan tai. Evan. N. Leikhamba Singh chule 2012 kum in a pension kit tai. Zia phat chun, 2013 kum in Evan. Lienboi Neitham chu Synod in Chingmei ah a hung sawl hi. Zia kipat chun ama chu tawh 2019 tiang ka semkhawmu'i. Ama tawh ka umkhawm sungun, Mata, Leisang veng ah Chanchinpha gen in ka chiau'i. 2014 kum in Mata ah kipat Nk. Chonghoiting tawh Mata, Leisang veng ma ah chun thugen in ka chia kitua, Pathian hepina leh umpina zal in mi pakua (9) in pianthakna a neiu'i. Tichun, Baptisma ka chansak ah, kikhawpkhawmna ding

mun le ka siam ngalu'i. Mata leh Mata Vengthak ah kipat Kochuamte'n Biak-In sakna din thing leh gua a pawimaw bangkim hung chawikhawm in Biak-In tundaw a hia, Rev. Thangkhoen, Mata Bial Pastor in hawwna a nei hi. Rev. Thangkhoen hi Biak-In sakna nasatak ah panlatupen khat a hia, a hawn ni a hinle anchang leh Sanga a hung tuak hi. Pathianni sin leh gingthakte chu Biak-In thak ah chun a kikhawm seku'i. 2015 kum ah ILP (Inner Line Permit) chungchang ah buaina zia in ziatok ah kikhawm sekte chu khua chuam in a kichawn tau.

2015 kum in (L) T. Mangijao Singh chanu Pi Premolata In chu kipawlkhawmna mun thak ding ah hawndaw a hi. A In chu Chingmei Biak-In ah kipat 2.5 km. ah gamla, Mamang Saban ah um a hi. 2018 kum in Chingmei Biak-In huangsung in Rev. C. Zorammawia, Administrative Secretary, Manipur Area in Pastor Quarters a hung sak piak hi. 2020 kum in B.

HINNA VÂK

Phainuam Bial ah chawn in ka um a, ka thasang ah Chingmei enkawl ding in Rev. Genlianpau kawî a hi. Zia hun lai a hin Lamka Kochuam kithuapina'n Mamang Saban Biak-In sakdaw a hi. Chuleh, ama panlakna'n Synod in Evangelist quarters, huangsung kelkawt leh tui chawpdawna siamdaw a hi.

Vangsiat umtak in May 3, 2023 ni'n Meitei leh Kuki buaina hung piangdaw in, May 14, 2023 ni'n In ka kile hi. In ka tun in Chingmei Biak-In leh Quarters-te chu mu di khatle a lah um tapuai. Biak-In leh Quarters-te chu buai zia ah khan suksiat leh halthak in a lah um ta, Kochuam mi leh sa te le tha bangzat hem kikhawm thei talo in a um tau. Gingtute kikhawp di le ei phal tapuau. Manipur govt. in Internet le a shutdown zia in, October 2023 tuam in Phone call conference mangcha'n, Pathianni kikhawp leh pauchapna ka nei seku'i. Internet a hung kihawn kit phat in kikhawpna chu online

in, Pathianni zingkal dak 10 leh nitaklam dak 6 in ka nei sekua, Nilai nitak kikhawp hi Bible study in dak 6 ah ka kikhawm seku'i.

Hatchungnung Pathian chun gîtna leh suklauna lak in hatna leh hansanna eipia'n, Pathianni kikhawp thei didan lampi ei siampiak hi. February 25, 2024 ah kipat in keiu In ah Pathianni kikhawp ka nei pan thei tau. Tuhin chu, (L) Evan. T. Mangijao Singh In chu Chingmei leh Keibul â ding ah a lailungpen a hi zia in Pathianni kikhawpna'n ka mang seku'i. Mi 20-30 kikal in kikhawpna ka nei zing thei seku'i.

Halleluijah! Muthei Biak-In chu suksiat leh haltum in um maleh Pathian temple i lunggil sung ah um chu susia theilo in nasatak in a vâk zaw diak hi. I Lalpa Jesu Khrista, chungnungpen Pathian in hatna leh thilhitheina ei piak zâl a hi. Zia thagau chu bangmacha'n suling thei pua'na. Ziagual lawm ah

suklauthawwna leh haksatna kâl a hin i Kochuam mi leh sa kuama a ginna phatsan a um puai. A hepina leh phatna zia in mi sawmguk (60) te chu bit tak in ka um zingu'i. Lungthim leh ngaituana lam ah sukgenthei ah um in, Dan leh mual ah gâk ah um in, gensiatna tawh suklauthawng ah um in, a hi, haksat tak leh lungngai um tak ma chu a hi. Ahinla zia thawknate hi tunung ah lopina leh kipakna van ah i dawn dingte chu tawh tekhin kham a hi puai. "... Lalpa chu ka âng in ka mu zing sek ah, ka kichawn lona ding in ama chu ka changlam in a um ah; tichun ka lungthim a kipak a... Nang in la mel ah chun kipakna'n ei sudim ding la hi..." (Nas 2:25-28). Ka zi

tawh Biak-In lam zuan ah ka chia lai un, ka khuateu chun, "Thingtangmite Pathian, Jesu chu ho leh bia ding ah kisa kit la tau em?" ti'n ei dawngua, "I, ka thi unle, khrista ah, ka hin unle a ma min in, haisan ziang thei ka hi puau" ti'n ka dawnhu hi. "...Thina a h'em, hinna a h'em...thilhitheina a h'em, sâna a h'em, thûkna a h'em... I Lalpau Jesu Khrista ah um, Pathian hepina kipat chun ei khen zo pua'n a." (Rom 8:38,39). Zia hi ka kitepnau chu a hi. Simtu dawitakte haw, zia kitepna hi lunggil ah ka vawp zing theina ding un la pauchapnau in ei delzui zing un aw. I Pathian hing zing chun i chanchiat un ei malzawl piak ta hen. Amen.

KHRASTIANTE CHU

Khrist lungput ah lungput nei,
Khrist kampau ah awsua ding,
Khrist hepina lunggil nei ding leh,
Khrist panpina khut nei dingte i hiu.

“SUNGIL LAM AH TAKNA”

(Sam 51:6)

~ *Upa Siakkap*
Kawlhen

Mihing hinkhua leh khankhua matding dan i Bible ah hin vel tam tak mu in a um ah. Bawl ding leh bawlo ding dawlte le i mu tam ma ma ui. Pu leh pate kipat inle i la dawngto ua, nu leh pate vang vang in chu i chate kiang in i dawidan leh i lunggelte haw i hil zel sek ua lamdik a pat mansan khak ding lau in theitawp in pan i la sek uh a hi.

Mihing khat chu sekphat thei siamzan thei ti a hia. Thupilte 22:6 chun naupang chu a chiana ding lampi nunmu leh chun a t êk nung tiang inle thasuak ta puan ah ti a hi. Tulai khang a hin, hinkhua dik mang, ti tak tak ah mang i tawm hiai hiai in a kilang ah, dan khawk saklona a pung tial tial ta mai ah. Lalpa Ni chan thiantho i ngainep deu deu ua, semlo ah nek ding i ngaituanau in a lian deu deu hi. Pathian nasem kahi i kiti zinglai in i sepna ding mun

ah um ziang haksa i sa tau ah ginum tak ah sem ding ah thutiam nei tangal in sunggil lam ah takna a la tasam sek a bang hi.

Ka neulai deu in lawite tawh kumleng hawl in gamlak ah ka kuansek ua. Kumleng gui i mu phat leh a gui a tak ta hen tak ding ahi ti in kinem tak in a kilai sek ah. I lai zaw phat leh dawtna kimu masapen chu a tak em ti ahisek hi. Gingtute haw thutak ah um ding chu Lalpa ei kineppina a hia. 3

Johan 4 ah chun ka chate thutak ah a um zing ui ti ka het khel ah kipakna lianzaw ka nei puai a tii. Samuel in Israelte leng ding ah David sathau a nu ding ah chun a mel latdan a h'em, a din sandan a h'em in en kin la, mihingte chun a pawlam mel latdan in a en sek un Lalpan vang sunggil a en sek hi.

Mihingte hinle a sunglam tak i dawu ua. Balbut kihuan khu a hawng kikhe ah a sung kine ahin. Kawmla khule a hawng kikhe ah a tak kine a hi. Eiun bawn a sunglam tak i dawu ualeh Lalpa'n vang dawu zaw diak lo ding a h'em? Mi

ginum, mi titak, a sepna ah gunchu, sunggil lam thiango Lalpan a dawu a hi.

Missionary Rev. P.G. Lala in butak leh a lem khen a hi gual in Lalpan hun khendan ngei ding ahi tin La'n a la zik hi. Simtu dawitak, khatvei tei chu thukhenna hung um in tin, a tak la hi em, a lem la hi em la damlai nun in zia chu hun paw dawu ding a hi. Suak pha leh ginum la bawl phai la pu kipakna ah lut in ti kha ei uh kiang ah a gen hi ding in i kidawisak ah. Zia paukam chu i het theina din damlai hinkhua chawmcha sung hi sunggil lam takna nei ding in pan la thak kit hi tiu.

Thilpha chu la **sep theina** zosia'n,

Kawng bangkim in,

Mun zosia'n,

Hun zosia'n,

Mi zosia kiang in,

La thei laisia'n sem in.

~ John Wesley

“HUN KIPÂKUM IN KA NGAITHAI ”

~ Upa Liantinkhai
Compound Veng

Tangval pakhat thilsual liantak a bawl zia in Court ah a chungchang thu tan piak ding a hi ta, Tangval beidawng chun zia gamsung ah a lawipa Ukil thiampen chu a va nai a, a haksatnate chu a va hil a, Ukil chun, *“Hun panpi ingka, zingleh dak sawm leh ni in hung inla, hun genfel piak ingka”*, atia. A kipak khawpmai a, a gual leh pai dangte kiang in a gualpa Ukil pa’n a genpi ding thu gen vel in a kisa la ma ma ziang a, a zing sun dak 12 tiang in a vak vel vel nalai a. Zia ni nitaklam a chu Ukil chu a va kimupi ta; himaleh Ukil chun, *“A khawk na maizen e! ka tiam hun in la hung ta pua, tuni nitaklam dak khat a khan Ukil ah kipat in vaihawmtu (Magistrate) in Sawrkar in ei kawita, tuhin chu genpiaktu hilo in, la hina gual gual ah vaihawm ding ka hung hita ngal a, ti’n a ngaina ka hetalo a hi”*, a la tisantai.

Hepina hun i mat zinglai ua hin Lal Jesu chu migilote â ding ah Pa kiang ah genpiaktu (Ukil/Advocate) ahia, Paul in Lal Jesu hi, *“Pathian changlam ah ei genpiaktu”*, ti in Ukil ahidan a gen a (Rom 8:34). Johan inle, *“Kuanle thil a hikhial chun Pa kiang ah ei genpiaktu, Jesu Khrista midik chu i nei ui”* ti’n Lal Jesu chu

Ukil a hi zia a gen bawk hi (1 Johan 2:1). Hebrai ziaktu inle Lal Jesu hi Ukil lopi pen hi’n a gen hi. *“Thiampu lianpen, i hatlonateu ei hetpi phaklo nei i hi puau ah, ei haw gual ah patepna tincheng a la tuakta maleh, gitlona a la neilo chu nei i hi zawu hi. Ziaziakchun, hepina chu i chan theina ding in leh panpi ngai hun*

ua panpina chu dawng ah, lungsiatna i mu theina ding un, jangaina lalchutpha chu hangsan tak in nai hitiu”, atia (Heb. 4:15,16). La phuaktu inle, “ka min bangmalo Pa âng in, Lal Jesu’n panpi’n a”, ti’n a la phuak dawh hi.

Ahinla i Lal Jesu’n zia hepina hun a hin genpiaktu (Ukil/ Advocate) hi zing zianglo ding a hi, Vaihawmtu (Magistrate) hung hi phut ziang thei ding a hi. Zia hun a chun kingaitawmna puansil kha lopi leh thupi tak ah kithuam in kilak zaw ta’n a, ngaidamtu kha phubalatu hi ta’n tin, zangaina lalchutpha kichu sek kha vaihawmna lalchutpha ah chu ta ding in, ngaitiam un, tu hi hukdamna ni chu a hi” ti’n ei gen hi (II Kor. 6:1,2), tu hun ah i nailo ua chun dantak leh vaihawmtu hita ding ahia, vaihawm ding in a hung thut ziang thei a hi, a hung ma’nle ei hawle i thi thut thei ui. Zia zangaina hun sung ahin kithada tak in hing le hin, lungsiatna hun a tawp

hial leh chu kisik ma ma ding i hiu. *“Hun sawt hal kin, vaigei kha’nla. Hung in ngaidam hun dawn in, a vaigei tai la ti’n ah, Nazareth Jesu’n mual a khum tai”.*

Jesu School ah kai ah, Thagau Thiangtho in a sawizawi takte chun,

- 1) Thawkna chung ah umdan a thiam ua
- 2) Thuak pum ah, kipak dan a thiam ua
- 3) Thina chung ah, hindan a thiam ua
- 4) Thân ah a chiau inle thawkikna thîldan a thiam sek ui.

I damsung hun chawmcha sung khêllam hi chu kumtuang gam hi veng veng ta ding eivei. Zia thu hi ka simlai in, keima ngeile ei siam hawi ma ma in, midang le a siamphat ngei kadawi ma ma ziak in ka hun sua a hi. A sim kha tapo in, a phatchuampi ngeina ding un ka Pathian kiang in ka pauchap piak hi.

“HEPINA MAK” (Johan 3:16)

~ Nk. Grace Lamthianhoi
Jiribam

Thilsiam Bu 1-2 i sim chun Pathian in lei leh van leh a sung ah thil um zosia a siam thu i mu. Thil lamdang tak khat chu a hileh a thilsiamte kha ‘um hen’ ti kampau mang in a siam a, ahinla mihiam a siam khan ‘um hen’ a ti pua, ti hin a gen zawi, “*I kibatpi, eimau gual melpu’n mihing siam hitiu*” (Thilsiambu 1:26).

Zia chun bangtin mihing a siam a tam i ti chun, Thilsiambu 2:7 khan ti hin i mu, Lalpa Pathian in lei ah leivui in mihing a siam ah, a nâk hawmte ah chun hinna hu a tha lut ah; mihiam chu mihing a hung suak tai. ‘Lei ah leivui in mihing a siam’ ti hin Pathian in a khut mang ngei in mihiam a siam a hi.

Sam 139:14 a chun, “tizat um tak leh lamdang tak ah siam ka hi zia in” ti i mu, zia kipat hinle thilsiam dangte tawh i kikhiatnau hetthei in a um a, zia chu a hileh Pathian khut hattak in ei tuakhawm a hi zia in. A lopi na lawm lawm

e! Zia hinle Pathian in mihing a hepi dan mu leh het thei a hi.

A chawmlam in vak ki gen lehim, Pathian in a khut mang ngei ah a siam mihing khan, Pathian thu a awilo zia in gitlona/ sual ah a la pûk ta. Tichun, Pathian chu ‘*Thiangtho*’ sual tawh umkhawm theilo a hi zia in mihing tawh a kikal uh chu sual in a hung khen ta. Zia sualna zia ah chun Pathian lopina i chang zo tapuau. (Rom 3:23). Sual chun banghem a hung tut i ti kit chun THINA a hung tut hi.

Gitlo man chu thina a hi ngal ah. (Rom 6:23). Tichun,

Pathian in mihing chu A ma tawh umkhawm thei talo ding thina chang ziang ding chu a ngai ngam pua; sual ah i um zinglai inle ei hepina kha a dai puai. Eimau leh eimau kihukdam thei talo ah i um lai in, a hun tak ah a chapa Jesu Khrista chu i gitlona pua ding in a hung sawl a (Rom 5:6); Kraws ah a thina leh thawkitna ngei chun. Kuale Lal Jesu chu Lal leh Hukdampa a hi ti ging zosia chun kumtuang hinna a nei a hi (John 3:16).

Pathian hepina chu Lal Jesu ah chun chiantak in taklat a hi. Pathian lopina chang zo talote kha, Lal Jesu zal in i chang tau a hi. Zia bep chule hilo in, Pathian chate sak in i um tau a hi (1 John 3:1). Kumtuang gawtmun chang dingte kha van khua leh tui hina (citizenship) ei pia a hi (Philippi 3:20). Pathian hepina nasat dan chu Pathian thugentu khat gen dan chun ti hin a gen hial a hi, *“Khawvel ah hin mihing nang bep um hile chun le Lal Jesu chu nang a ding in, a Lalchutpha hung nusia’n, gitlo/ sual tatna nâ*

chu hung bawl tho tho ding a hi”. Zia chu a hi Pathian hepina thûk leh mak tak chu.

Pathian chu hepina a hi (1John 4:8). Zia hepina chu ei hawn le i nei ua, i kihepitua chiat ding hilo a h’em? Pathian ka hia, ka hepi hi i ti, hilehle a thupiakte i zawplo chun, mi lepchia i hui. Thudik chu eimau ah umlo a hi (1 John 2:4). Pathian i hepi a hi ti het theina chu, i mihing chanpita i hepi ah, kampau bep ah hepilo in, nasepna tawh a kithua ding a hi (1 John 3:18). Panpi ngaite panpi ah, Lalpa â ding ah bawl kahi ti ngaitua zing kawm ah kipak tak ah sem ding i hui.

Pathian chun Ama lam kipat chun bangkim Ama i het/gin theina ding in lampi a hung siam a. A ban chu nang leh kei khut ah kinga ahi tai. Ama i gin a, i hepi ah, a dawigual ah um, a hilo leh ei dawidan ah hinkhua mang ah um. Nangma thu’n thiam chang in um in la tin, nangma thu ma ma thiamlo chang ding la hi, a tia (Matthai 12:37). Amen

SEMINAR DING AH KISAKLAWKNA

CKNP Kikhawmpi thupukna “Taksa leh thagau ah Insung etkawl dan” ti thupi mang ah seminar nei di ti thu chu bawzuina nei in, June 6, 2024 (Ningani) ah Synod Office, Committee Room ah CKNP Committee chun, thupi ziktu Rev. K. Neihzial, Synod Moderator tawh Bial tin ah seminar pe dite training nei a hi. Zia Trainers Training chu lawting tak ah matzaw a hi.

Bial tin ah Seminar thupi la dingte chu a nuai ah gual hi a hi.

Sl. No.	Bial	A chia dite	
1	D. Phailian	Pi Thuamkim	Pi Hatneimawi
2	Mata	Pi Chinglalven	Pi Lalthazo
3	New Lamka	Pi Hauchin	Pi Pauthianting
4	Panglian	Pi Damjohny	Pi Pautinting
5	S. Munnuam	Pi Kh. Thianniang	Pi Ngaiремmawi
6	Lamka	Pi. Hoipakkim	Pi Nemsonkim
7	S. Kawtlian	Pi Thuamkim	Pi Chongneu
8	Kangvai	Pi Hoipakkim	Pi Ting Zeneth
9	Dumlian	Pi Rody Lamneiphal	Pi Chinboinu
10	Sugnu	Pi DamJohnny	Pi Hauchin
11	Munpi	Pi Lhingkhovah	Pi Ting Zeneth
12	D. Khawzim	Pi Kh. Thianniang	Pi Khawlnei Grace
13	Kawlhen	Pi Nengneithem	Pi Nemsonkim
14	Phailianbung	Pi Chinglalven	Pi Thethem

July 2024

15	Phaipheng	Pi Lhingkhovah	Pi Niangjoykim
16	Leijangphai	Pi Nengneithem	Pi Veithiannei



Panglian Pastor Bial KKP

Panglian Pastor Bial Khristian Khanglai Pawl te’n Bial KKP Conference 16 veina ah “Frontline duty te panpina piak hileh” ti ah ala thupuk uh chu 24th May, 2024 ni’n ala supiting thei u’i.

Panpina thilpiak te hi Bial KKP in Branch tin mawpuakna pia in thei kham kham dawl khawm ahia, dawl dawk zat zat chu a tawm a tam thu um lo in Khua pa 5 (New Dâmpi, Torbung, Kangvai, Muangât leh Laika) te kiang in ava hawm dawk thei u’i.

Thilpiak piading ahin Bial KKP Puitu, Ex-officio leh Kochuam Upa te haw tawh kalsuan in, ve na mun zosia’u ahin pauchapna ana malam vek thei uhi.




Bial Lapawl neitheh Pastor Bial leh a term te

Sl. No.	Bial	Term
1	D. Phailian Pastor Bial Lapawl	2024-2026
2	New Lamka Pastor Bial Lapawl	2024-2026
3	S. Munnuam Pastor Bial Lapawl	2024-2026
4	Mata Pastor Bial Lapawl	2024-2026
5	Panglian Pastor Bial Lapawl	2024-2025
6	Lamka Pastor Bial Lapawl	2024-2026

7	S. Kawtlian Pastor Bial Lapawl	2024-2026
8	Dumlian Pastor Bial Lapawl	2024-2025
9	Phaipheng Pastor Bial Lapawl	2024-2025
10	Munpi Pastor Bial Lapawl	2024-2027

Bial KKP dang ve

D. Phailian Pastor Bial in Bial KKP Conference 16-veina ah Bial KKP dang vena nei ding a la ti uh chu May 16, 2024 (Ningani) in Phaipheng Pastor Bial KKP vena a va nei thei ui. Programme hi Phaipheng Pastor Bial sung ah Tuilileibul Kochuam Biak-In mun ah nei ahia, Pathian Biakna Kikhawp, Seminar leh Fellowship te in Taksa leh Thagau ah lawting tak in hun nuamtak mat a hi. Kivethakna ahin Khanglai mi 130 vel a kalsuan thei ui.






Sunna

UPA KAICHA (KAIZALAM)

(March 1, 1940 - February 5, 2024)



Upa (L) Kaicha (Kaizalam) hi Pu (L) Ekkhai leh Pi (L) Dimzachin te gil ah ga Pathian malsawmna cha pathum lak ah pasal changkhat ah Nunghatang, Tamenglong District, khuá'n 1st March 1940 kum in a piang hi. Pi (L) Tingngainem d/o Pu (L) Tongtinthang leh Pi (L) Neichinting, Phaipheng khuá tawh 1966 kum in Kochuam Dân thiangtho in a la kicheng ua Nunghatang, Khoupum, Tamenglong District khuá'n a la khawsa'ú hi.

1962 kum in Nunghatang ah kipat in Phainuom, Khoupum Valley ah a pemlut hi. 1977 kum in Phainuom Hausapu, Pu Lienkhomang kiang in School hawn phalna a la dawn a, Hausapu lemsakpina'n School a hawng hi. Zia School ah a sep zing lai in Govt. Teacher sepna a mu ngal ah, a pension ni, 2013 tiang in zia nâ chu ginmun tak in a sêm hi. Ama hi mi pawlnuam, zainem, mawpuakna ngaikhawk, Kochuam vei ma ma khat a hi. A pianthak (1971) ah kipat in taksa lam sang in Thagau lam ngaikhawkna a nei a, In leh Lo nusia ngam khawp in Chanchinpha a vakvai pi hi.

Apa Pu (L) Ekkhai hi sep leh bawl lam ah mi kûkal, thahat, Bu hau (Tin 1500) tiang a la thodawk, Gamsa le 100 vel tiang a la kâp mi a hi. A pa hin a chapa changkhat (L) Upa Kaicha hi a-ît ah a lungsiat ma ma zia in sîn khat zân khat ziangle a ngen ah a giakdaw ding phal seklo a hi. Lekha sim ah mun chuam ah a va um dingle phal lo a hi.

Upa Kaicha hi Pathian awilo, thingbul suangbul ho ah kithawina a la nei a nu leh pa tawh hung khawsa'n nek leh chak, sep leh

bawl ah mi awtcha lo ah a la khawsak zing lai in kum 1955 kum in Pathian awi/ging ding in kochuam ah min a la khum lut ah kum 10 sung chu lungthim thamuanna tak tak neilo in Christian minpu mai ah a la um nung 1975 kum in pianthak na tak tak nei in Pathian thagau thamuanna a la nei hi.

Phainuom (Satudai), Khoupum, khua a zi, a chate tawh a la khawsak zinglai un, 1990/'91 ah Lamka lam ah hung zindawk chu Naga Gâl ziaik in Head quarter veng, Lamka ah a la chêngden tau hi. 1997 ah Ûnau Paite-Kuki kâl kihiatthiamlo na ziaik ah buai ziaik in Lamka a pat Torbung ah a la chenglut kit ua, tuni a thi ni chan in Torbung, T. Munjang ah a cheng ui.

Upa Kaicha hin pianthakna dik a hung kimu a pat in Pathian â ding ah titzawlona bat (Debt) nei in a kihe ziang hi. Nikhat hi thingtâng lo ah a kuan na hin hitia hin a pauchap ta a hi. “Aw hepa ! ka Pathian, kanu le kapa hi Bû le bâl neksênlo in la malzawl ah a hinla la malzawl na hi Nang Pathian tak a pat a mû'û a hi helo in leh Nang chawihawina manglo in thingbul suangbul pathian te kiang ah kithawina'n a mang sek ui, ahin, keivang kanu kapa te bû le bâl ah la malzawl gual hilo in thagau mangthai lainatna lungthim in ei malzawl in” tî'n a pauchap hi. A pauchap ah a thugen chu a pa'n a hetphat in a lungna hiti'n agen hi - “Nang hausakna ding, la sakâp thiamna ding ah kidawn dawn ah nang in maw hitia chu la gen, tî'n a chapa kiang a chun 'pauchap thak kit inla ka pauchap ah kadawt kha kadawt khial a hi, ei ngaidam in' ti kit ah tî'n a pa'n Upa Kaicha chu a gai hi.

Pathian ah a pauchap na a lawting hi'ntin thagau mangthai veina nei in 1994 kum in **“Youth For Gospel Ministry”** (Khangthak te Pathian lam ah a kipiak ua a nâ a sep theina ding uh) tupna'n a la pandawk in, a kithuapi ding in South India lam a pat Missionary nâ sem ding ah hung pawt Dr. Paul Rajendra a chial ah ama'n le thanuam tak in a kithuapi hi. Churachandpur ah Missions chuam chuam a pat thagau leh taksa ah suan um tak tak lawi-upa khenkhatte tawh pangkhawm in **“Youth For Gospel Ministry”** min in Gospel Tracts te America lam a pat Pathian a

HINNA VÂK

ding ah tawmngai hun sua ah a hun thawt seku chu Hindute leh i Christian chanpite kiang ah hawm in Open Air Preaching te nei in Pathian nâ a kham kham in a la sêm hi.

Thagau lam ngaikhawk bek ziak in tu leh cha nei nung tiang inle Bible Training - Aizawl leh ei gam ahte in a la chia hi. Khawmpi na le gam chuam chuam a la chuan hi. Sapkâng te tawle Pathian nâ a la sêmkhawm ui. Thagau mangthai veinatna ziak in taksa lam ah insung enkawl manlo khawp in a hun a la mang ah, taksa ah cha leh naute a piting ding gualua siam piting talo in a la um hi. Taksa lam ngaikhawk malak in a chate hi mi 8 ahiu ah a bawn ua hi Bible zilsak chiat ding ti a la tup pipen a hi dungzui in a chate mi pathum te chu sângtak hilo leule Bible a la zilsak hi.

A thi ma, tha 8/9 masang tiang khanle a chate ding gêlna'n a tupa Rev. Mangkhokam, ESC, Lamka guai in Insung Crusade Ni 2 sung eila matpiu hi.

Asthma, Zunthum leh BP sang nei, Lo leh ai tawh kikhenlo ah a hung khawsak zinglai in a natna hung khawk deu deu in District Hospital tut ahia, ni 3/4 vel Doctor ten a zen nung un damzo talo in Date 5th February 2024; 3:30 AM in A nâ a seppiak Pathian in A ma kiang ah chawldam ta ding in a hinna a la kilâk tai.

A lawinu Pi (L) Tingngainem - damtheilo, mi mawl chu hun tamzaw a chate tawh Pathian thu ziak ah a nutsia sek ziak in taksa ah châ leh naute dûthusâm gual tak in a la siam manlo ta lele thagau lam ah zia tiang eila tut uhi achate'n kapa'u ei dawisakna'u leh a nasep lopi dan ka hedawk thak ua kapa chung ahin kakipak takzet uh a hi.

“Hepa... la la bawl hawi nalawm lawm e maw ..! ka vangpha nau e.. maw. ..Pa...!”

Upa Ordination a lâk ni : 29-10-1977 (ESC)

Minister : Pastor T. Selluoi

Kochuam Dân thiangtho ah zî a nei ni : 26-04-1966 (KCA)

Minister : Rev. Tongkhokhai

July 2024

Bial leh Kochuam ah a pannate:

- ~ Torbung Kochuam phuttu te lak ah pakhat a hi.
- ~ Torbung Kochuam Chairman, Secretary leh Finance Secretary.
- ~ T. Munjang Kochuam, Gam Thak Committee Chairman
- ~ S. Kawtlian Bial Standing Committee & Nomination Committee

Gil ah gâ Pathian malsawmna a chante

1. (L) Khaizakap
2. Pi Chin Mary @ Muongpi w/o S. Kapcha Gangte
3. Pi Tingthienhoih @ Hoinu w/o (L) Angkham Khumlo
4. Upa Lalsuon h/o Nemneivah
5. Pi Chongkholhing @ Boinu w/O Khamthianlel
6. Pu (L) Thanglaljohn @ Jojohn h/o Tingngaichong
7. Tv. Pauminlian @ Mimin
8. Nk. Kimneihthiem

A tû te : Mi 17

Pawsal : 9 ; Numei : 8

A tusaw'n : Mi 4

Pawsal : 3 ; Numei : 1

*Report petu
Upa Lalsuon
T. Munjang Kochuam*

HINNA VÂK

UPA V. PAUNEIMANG

(March 21, 1962 - April 27, 2024)



Upa (L) V. Pauneimang hi March 21, 1962 kum in Lamka, Lingsiphai khua'n a piang hi. (L) Pu Laltinlel leh (L) Pi Niangkhonei (Neicha) gil-ah-ga pawsal 5 leh Numei 5 te lak ah upa pen a hi. Pi Taizahat tawh 1983 September in a kicheng ui.

Pathian malsawmna gil-ah-ga chapa 2 leh chanu 2 a nei ui. Pathian malsawmna a dawng a, tu mêl 7 a mu malam hi.

Sepna lam :

Ama hi May 20, 1980 kum in Electricity Department ah lineman in a sem pan a, 2023 kumbul in a la pension hi. Zia na a sepsung hin 2021 kum 72nd Indian Republic Day in Pawan Yadav, IAS, DC Churachandpur khut in Technical Assistant MSPDCL Churachandpur Division Award a la dawng hi.

Ama hi tukum February tha tawp lam in Mizoram ah a tu-a chate kantha ding in a vazin a, taksa sawiselna a nei zia in Synod Hospital, Durtlang ah a kietsak leh gilpi cancer a hung man dawk ua, zia ah kipat chun damna ding lunggul in NEIGRIMS Hospital, Shillong ah Operation a kibawl a, phatlam manaw a kisak lai in chemotherapy a kibawl leh hung chausia gawp in, ICU ah hun bangchan a h'em etkawl himaleh damdawk zo talo in a na a sep piak Pathian kiang in April 27, 2024 zan dak 11:45 PM in, a it a ngaicheng nusia in a la chawldam ta'i.

July 2024

Kochuam ah a nasepna:

1. Bethany Kochuam Tual Upa ding in May 12, 2013 ni'n teltin a hi.
2. Bethany Kochuam ah Chairman/Secretary/Finance Secretary/ Treasurer/ Sunday School Superintendent/ Ziltiltu te a la sem hi.
3. Bethany Kochuam Biak-In saklai ah a sun a zan tilo a, tawmngai tak ah a la pangtu a hi.
4. D. Phailian Pastor Bial ah 2021 kum in Bial Treasurer na a la sem hi.
5. October 8, 2017 kum in Lamka South Presbytery Kikhawmpi 6-veina, New Lamka Kochuam Biak-In ah Rev. Joseph Lalnunmawia khut in Upa Ordination a la chang hi.

Date 30 April, 2024 (Sepkitni) in Lamka South Presbytery Elect Moderator Rev. Thianginlim i/c S. Munnuam Pastor Bial in VCC thanmuan in a vui hi.

*Report petu,
Upa Khailianthang
Secretary, Bethany Kochuam
D. Phailian Pastor Bial*